

六祖壇經

法海前期本的還原本

林崇安編校

2018.05

【說明】

一、惠昕系六祖壇經的形成：

〈法海前期本〉（678 頃）→〈法海後期本〉（714 頃）→〈志道抄本〉（750 頃）→〈惠昕母本〉（967）。

二、敦煌系壇經的形成：

〈法海前期本〉（678 頃）→〈法海後期本〉（714 頃）→〈道際抄本〉（750 頃）→〈敦煌母本〉（940 頃）。

三、契嵩系壇經的形成：

〈法海前期本〉（678 頃）→配合〈惠昕本〉（967）以及〈景德傳燈錄〉等→〈契嵩長本〉（1056）和〈契嵩短本〉（1060 頃）。

三、〈法海前期本〉的名稱是《六祖法寶記》，是所有壇經的源頭。此處還原的〈法海前期本〉可作參考之用。

四、於此經文中，分段編號，並標出品名，這是為了便於惠昕、契嵩、敦煌諸系本之間的相互比對。

〈法海前期本〉

【經名】

六祖法寶記

【眾請說法品】

【A1】

大師於大梵寺講堂中，昇高座，說摩訶般若波羅蜜法，授無相戒。

其時座下僧尼、道俗一千餘人，刺史韋璩、官僚三十餘人，儒士三十餘人，同請大師說摩訶般若波羅蜜法。

刺史令門人法海集記，流行後代。學道者，承此宗旨，遞相傳授，有所依約。

【悟法傳衣品】

【A2】大師言：善知識！淨心念摩訶般若波羅蜜。

【B1】大師不語，自淨心神，良久乃言：

善知識！淨聽！

惠能慈父，本貫范陽，左降流於嶺南，作新州百姓。

惠能幼小，父亦早亡。老母孤遺，移來南海。艱辛貧乏，於市賣柴。忽有一客買柴，遂領惠能至於官店，客收柴去。惠能得錢，却向門前，見一客讀《金剛經》。

【B2】惠能一聞，心明便悟，乃問客曰：「從何處來，持此經典？」

客云：「我於蘄州黃梅縣東馮茂山，禮拜五祖弘忍和尚，見今在彼，門人有千餘眾。我到彼山，聽和尚說法，常勸道俗，但持《金剛經》，即得見性，直了成佛。」惠能聞說，宿業有緣，乃蒙一客取銀十兩與惠能，令充老母衣糧，教惠能便往黃梅禮拜五祖。惠能安置母畢，便即辭親，往黃梅禮拜五祖。

【B3】問曰：「汝何方人，來此山禮拜？今向吾邊，復求何物？」

惠能答曰：「弟子是嶺南人，新州百姓，遠來禮拜和尚，不求餘物，唯求作佛。」

五祖言：「汝是嶺南人，又是獼獠，若為堪作佛？」

惠能答曰：「人即有南北，佛性即無南北；獼獠身與和尚不同，佛性有何差別？」

【B4】五祖欲更共議，見左右在傍邊，遂令隨眾作務。

有一行者，遂差惠能於碓坊踏碓八个餘月。

【B5】五祖一日喚諸門人盡來。

曰：「吾向汝說，世人生死事大。汝等終日供養，只求福田，不求出離生死苦海。自性若迷，福何可救？汝愆且歸房自看，有智惠者，自取本性般若之智，各作一偈呈吾，汝偈若悟大意者，付汝衣法，為六代祖。便作，不得遲滯！」

門人得處分，來至自房，遞相謂言：「我等不須呈心用意作偈，將呈和尚。神秀上座是教授師，秀上座得法後自可依止。請不用作。」

諸人息心，盡不敢呈偈。

【B7】神秀思惟：「諸人不呈偈者，緣我為教授師。我若不呈偈，五祖如何得見我心中見解深淺？我呈偈意即善，求法覓祖不善，却同凡心奪其聖位。若不呈偈，終不得法。甚難！甚難！」

【B6】五祖堂前，有步廊三間，擬請供奉盧珍畫楞伽變相及五祖血脈圖，流傳供養。

【B7'】神秀作偈成已，數度欲呈，行至堂前，心中恍惚，遍體汗流，擬呈不得。乃自思惟：「不如向廊下書著，若和尚見偈，忽若道好，即出頂禮，云是秀作；若道不堪，自是我迷，宿業障重，不合得法，我心自息！」

夜至三更，不令人見，遂向南廊下，中間壁上，秉燭題所作偈，呈心所見。

偈曰：

身是菩提樹，心如明鏡臺，時時勤拂拭，莫使有塵埃。

神秀書偈了，即便歸房，人總不知。

【B8】五祖平旦遂喚盧供奉來南廊下畫楞伽變。五祖忽見此偈，乃謂供奉曰：「弘忍與供奉十千，深勞遠來，不畫變相也。《金剛經》云：凡所有相皆是虛妄。不如留此偈，令迷人誦。依此修行，不墮三惡，有大利益。」

五祖遂喚門人焚香偈前，眾人見已，皆生敬心。

「汝等盡誦此偈者，方得見性，依此修行，即不墮落。」

門人盡誦，皆歎善哉！

【B9】五祖三更喚秀入堂，問曰：「偈是汝作否？」

秀言：「罪過！實是神秀作，不敢求祖，願和尚慈悲，看弟子有少智惠否？」

五祖曰：「汝作此偈，見解只到門前，尚未得入。凡夫依此偈修行，即不墮落。如此見解，若覓无上菩提，即未可得。須入得門，見自本性。

汝且去一兩日思惟，更作一偈來呈吾，若入得門，見自本性，當付汝衣法。」

神秀作禮便出，數日作偈不得。

【B10】有一童子於碓坊過，唱誦此偈。惠能一聞，知未見性。惠能未蒙教授，早識大意，遂問童子言：「誦者是何偈？」童子曰：「你不知大師言：生死事大，欲傳衣法，令門人等各作一偈來呈。若悟大意，即付衣法，為六代祖。有一上座名神秀，忽於南廊下，書《无相偈》。五祖令門人盡誦。悟此偈者，即見自性。依此修行，即不墮落。」惠能答曰：「我在此踏碓八箇餘月，未至堂前。望上人引至偈前禮拜，亦願誦取，結來生緣，同生佛地。」

【B11】童子便引惠能至南廊禮拜此偈。為不識字，請一人讀。惠能聞已，即識大意。惠能亦作一偈，又請得一解書人，於西間壁上題著，呈自本心。

惠能偈曰：
菩提本無樹，明鏡亦非臺，本來無一物，何處有塵埃？
院內徒衆，見惠能作此偈盡恠。惠能却入碓房。

【B12】五祖見眾人盡恠，恐人損他，五祖乃謂眾人曰：此亦未得了。

【B13】五祖夜至三更，喚惠能堂內說《金剛經》。惠能一聞，言下便悟。

【B14】其夜受法，人盡不知。便傳頓法及衣以為六代祖，衣將為信稟，代代相傳，法以心傳心，當令自悟。

五祖言：「自古傳法，氣如懸絲，若住此間，有人害汝，汝須速去！」

惠能領得衣鉢，三更便發歸南。五祖相送，直至九江驛邊。

五祖言：「汝今好去，努力向南，五年勿說，佛法難起，已後行化，善誘迷人，若得心開，與吾無別。」

【B15】辭違已了，便發向南。兩月中間，至大庾嶺，不知逐後數十人來，欲趁惠能奪衣取法，來至半路，盡忽却迴。

唯有一僧，姓陳名惠明，先是四品將軍，性行麤惡，直至嶺上，來趁把著惠能。即還法衣，又不肯取，言：「我欲求法，不要其衣。」

惠能即於嶺上，便傳正法，惠明聞說，言下心開。惠能却令向北接人。

惠能後至曹溪，又被惡人尋逐，乃於四會縣避難。經逾五年，常在獵中。雖在獵中，常與獵人說法。

【B16】惠能來於此地，與諸官僚道俗，亦有累劫之因。教是先聖所傳，不是惠能自知。願聞先聖教者，各須淨心，聞了各自除迷，如先代悟。下是法。

【摩訶般若品】

【C1'】大師言：善知識！菩提般若之智，世人本自有之。即緣心迷，不能自悟，須求大善知識示導。

愚人、智人，佛性本亦無差別，只緣迷悟，迷即為愚，悟即成智。

【C1】師言：善知識！吾今為說「摩訶般若波羅蜜法」。各各志心諦聽！

【C2】善知識！摩訶般若波羅蜜，是梵語，此言大智慧彼岸到。此須心行，不在口念，口念不行，如幻如化。

口念心行，則心口相應，法身與佛等也。

【C3】何名摩訶？摩訶是大。心量廣大，猶如虛空。

無有邊畔，亦無方圓大小，亦非青黃赤白，亦無上下長短，亦無瞋無喜，無是無非，無善無惡，無有頭尾。諸佛剎土，盡同虛空。世人妙性本空，無有一法可得。自性真空，亦復如是。

善知識！莫聞惠能說空，便即著空。第一莫著空。若空心靜坐，即著無記空。

善知識！世界虛空能含萬物色像，日月星宿，山河大地，泉源溪澗，草木叢林，惡人善人，惡法善法，天堂地獄，一切大海，須彌諸山，總在空中。世人性空，亦復如是。

性含萬法是大。萬法在性中。見一切人及非人，惡之與善，盡皆不取不捨，亦不染著，心如虛空，名之為大。故曰摩訶。

善知識！迷人口說，智者心行。又有迷人，空心靜坐，百無所思，自稱為大，此亦不是。此一輩人，不可共說，為邪見故。

心量大事，不行是小。莫口空說，不修此行，恰似凡人自稱國王，終不可得，非吾弟子。

【C4】何名般若？般若是智慧。一切處所，一切時中，念念不愚，常行智慧，即名般若行。一念愚，即般若絕。一念智，即般若生。

世人愚迷，不見般若。口說般若，心中常愚。自言我修般若，念念說空，不識真空。

般若無形相，智慧心即是。

【C5】何名波羅蜜？此是西國梵語，唐言彼岸到。解義離生滅，著境生滅起，如水有波浪，即名為此岸。離境無生滅，如水常通流，即名為彼岸，故號波羅蜜。

【C6】迷人口念，當念之時，有妄，有妄即非真有。念念若行，是名真有。悟此法者，是般若法。修此行者，是般若行。不修即凡，一念修行，法身等佛。善知識！即煩惱是菩提。前念迷即凡，後念悟即佛。前念著境即煩惱，後念離境即菩提。

【C7】善知識！摩訶般若波羅蜜，最尊、最上、第一、無住、無去、無來，三世諸佛從中出。將大智慧到彼岸，打破五陰煩惱塵勞。

【C8】善知識！我此法門從般若生八萬四千智慧，何以故？為世人有八萬四千塵勞；若無塵勞，智慧常現，不離自性。

悟此法者，即是無念、無憶、無著。莫起誑妄，用自真如性，以智慧觀照，於一切法不取、不捨，即見性成佛道。

【C9】善知識！若欲入甚深法界，入般若三昧者，須修般若波羅蜜行，但持《金剛般若波羅蜜經》，即得見性，入般若三昧。當知此人功德無量，經中分明讚歎，不能具說。

此法門是最上乘，為大智人說，為上根人說。小根小智人聞，心生不信。何以故？譬如大龍，下雨於閻浮提，城邑、聚落，悉皆漂流，如漂草葉；若雨大海，不增不減。

【C10】若大乘人，若最上乘人，聞說《金剛經》，心開悟解，故知本性自有般若之智，自用智慧觀照，不假文字。

譬如雨水，不從天有，元是龍王於江海中，將身引此水，令一切眾生、一切草木、一切有情、無情，悉皆蒙潤。諸水眾流，却入大海，海納眾水，合為一昧。眾生本性般若之智，亦復如是。

【C11】小根之人，聞此頓教，猶如草木根性自小者，若被大雨一沃，悉皆自倒，不能增長。

小根之人，亦復如是，有般若之智與大智人更無差別，因何聞法不自開悟？緣邪見障重、煩惱根深。猶如大雲覆蓋於日，不得風吹，日光不現。

般若之智，亦無大小，為一切眾生自有。迷心外脩覓他，未悟自性，即是小根人。聞其頓教，不信外脩，但於自心，令自本性常起正見，煩惱、塵勞眾生，當時盡悟。猶如大海，納於眾流，小水大水合為一昧，即是見性。

善知識！內外不住，去來自由，去除執心，通達無礙，能修此行，與《般若經》本無差別。

【C12】善知識！一切經書及文字、小大二乘、十二部經，皆因人置，因智慧性，方能建立。若無世人，一切萬法本自不有，故知萬法本因人興，一切經書因人說有。緣其中，有愚有智，愚為小人，智為大人。

愚人問於智人，智人與愚人說法，愚人忽然悟解心開，即與智人無別。

善知識！不悟，即佛是眾生；一念悟時，眾生是佛。故知萬法盡在自心，何不從自心中頓見真如本性。

【C13】《菩薩戒經》云：「我本源自性清淨。」識心見性，皆成佛道。《淨名經》云：「即時豁然，還得本心。」

【C14】善知識！我於忍和尚處一聞，言下便悟，頓見真如本性。是以將此教法流行，令學道者頓悟菩提，各自觀心，自見本性。

【C15】若自不悟，須覓大善知識，示道見性。何名大善知識？解取上乘法，直示正路。是大善知識，有大因緣，所為化道令得見性，一切善法皆因大善知識能發起故。

三世諸佛、十二部經，在人性中本自具有，不能自悟，須求善知識指示方見。

若自悟者，不假外求。若取外求善知識望得解脫，無有是處。何以故？

識自心內善知識，即得解脫。若自心邪迷，妄念顛倒，外善知識雖有教授，救不可得。自心若正，起般若觀照，一剎那間，妄念俱滅；若識自性，一悟即至佛地。自性心地，以智慧觀照，內外明徹，識自本心。若識本心即是解脫；若得解脫即是般若三昧。般若三昧即是無念。

【C16】何名无念？无念法者，見一切法，不着一切法，遍一切處，不着一切處，常淨自性，使六賊從六門走出，於六塵中，不離不染，來去自由，即是般若三昧，自在解脫，名无念行。莫百物不思，當令念絕，即是法縛，即名邊見。

悟無念法者，萬法盡通。悟無念法者，見諸佛境界。悟無念法者，至佛位地。

【C17】善知識！後代得吾法者，常見吾法身不離汝左右。

善知識！將此頓教法門，同見同行，發願受持如事佛故，終身受持而不退者，欲入聖位，然須傳授，從上已來默傳分付，不得匿其正法。

【C18】若不同見同行，在別法中，不得傳付。損彼前人，究竟無益。恐愚人不解，謗此法門，百劫千生，斷佛種性。

【D1】師言：「善知識！惠能與大眾作《無相頌》，盡誦取，依此行修，常與惠能一處无別。」

頌曰：

說通及心通，如日處虛空，唯傳見性法，出世破邪宗。

法即無頓漸，迷悟有遲疾，只這見性法，愚人不可悉。

說即雖萬般，合理還歸一，煩惱暗宅中，常須生慧日。

邪來煩惱至，正來煩惱除，邪正俱不用，清淨至無餘。

菩提本自性，起心即是妄，淨性在妄中，但正無三障。

世人若修道，一切盡不妨，常自見己過，與道即相當。

色類自有道，各不相妨惱，離道別覓道，到頭還自懊。

欲得見真道，行正即是道，自若無道心，闍行不見道。

若真修道人，不見世間過，若見他人非，自非卻是左。

他非我不非，我非自有過。但自卻非心，打除煩惱破。

欲擬化他人，自須有方便，勿令彼有疑，即是自性現。

法元在世間，於世出世間，一切盡打却，菩提性宛然。

【D2】師說法了，韋使君、官僚、僧眾道俗，讚言無盡，昔所未聞。

【功德淨土品】

【E1】次日，韋刺史為師設大會齋。齋訖，使君禮拜白言：「和尚說法實不可思議，今有少疑，欲問和尚，望和尚大慈大悲，特為解說。」

師言：「有疑即問，何須再三。」

使君曰：「和尚所說法，可不是達磨祖師宗旨？」

師言：「是。」

【E2】使君曰：「弟子聞說，達磨初化梁武帝，帝問達磨：朕一生已來，造寺、布施、供養有功德否？」

達磨答言：並無功德。武帝惆悵，遂遣達磨出境。弟子未審此言，請和尚說，達磨意旨如何？」

師言：「實無功德，使君勿疑達摩大師言。武帝著邪道，不識正法。

造寺、布施、供養只是修福，不可將福以為功德。功德在法身，非在於福田。」

師又言：「見性是功，平等是德。念念無滯，見本性真實妙用，名為功德。內心謙下是功，外行於禮是德。自性建立萬法是功，心體離念是德。不離自性是功，應用無染是德。若覓功德法身，但依此作，是真功德。若修功德之人，心即不輕，常行普敬。

若輕一切人，吾我不斷，即自無功德。自性虛妄，法身無功德。

念念無間是功，心行平直是德。

自修身是功，自修性是德。德即不輕，常行普敬。」

韋使君默然作觀。

師言：「善知識！功德須自性內見，不是佈施、供養之所求也。是以福德與功德別。武帝不識正理，非我祖師有過。」

【E3】使君禮拜，又問：「弟子見僧俗常念阿彌陀佛，願往生西方，請和尚說，得生彼否？望為破疑。」

【E4】師言：「使君善聽！惠能與說。世尊在舍衛城，說西方引化，經文分明，去此不遠。

若論相說，里數有十萬八千。若說身中，十惡八邪便是。

說遠只為下根，說近為其上智。

人有兩種，法無兩般。迷悟有殊，見有遲疾。迷人念佛生彼，悟人自淨其心，所以佛言：隨其心淨，則佛土淨。

使君！東方人但心淨即無罪，西方人心不淨亦有愆。

迷人不了自性，不識身中淨土，願東、願西。悟人在處一般。

使君！心地但無不淨，西方去此不遙。若懷不淨之心，念佛往生難到。

今勸善知識先除十惡，即行十萬。後除八邪，乃過八千。但行直心，到如彈指，便睹彌陀。

使君！但行十善，何須更願往生？不斷十惡之心，何佛即來迎請？若悟無生頓法，見西方只在剎那；不悟，念佛往生，路遙如何得達？」

師言：「惠能與使君移西方剎那間，目前便見，使君願見否？」

【E5】使君頂禮言：「若此處見，何須更願往生？願和尚慈悲，便現西方，普願得見。」

師言：「一時見西方。無疑即散！」

大眾愕然，莫知何是？

【E6】師言：「大眾！大眾作意聽！世人自色身是城，眼、耳、鼻、舌、身即是城門，外有五門，內有意門。心即是地，性即是王。王居心地上。性在王在，性去王無，性在身心存，性去身心壞。

佛是自性作，莫向身求。自性迷，佛即衆生。自性悟，衆生即是佛。

慈悲即是觀音，喜捨名為勢至，能淨即釋迦，平直即是彌陀。

人我是須彌，邪心是海水，煩惱是波浪，毒害是惡龍，虛妄是鬼神，塵勞是魚鼈，貪瞋是地獄，愚癡是畜生。

常行十善，天堂便至。除人我，須彌倒。無邪心，海水竭。煩惱無，波浪滅。毒害除，魚龍絕。

自心地上，覺性如來放大光明，外照六門清淨，能破六欲諸天；內照三毒若除，地獄一時消滅。內外明徹，不異西方。不作此修，如何到彼？」

座下聞說，讚聲徹天。但是迷人，了然便見。使君禮拜，讚言：「善哉！善哉！普願法界衆生，聞者一時悟解。」

【E7】師言：「善知識！若欲修行，在家亦得，不由在寺。在寺不修，如西方人心惡。在家能行，如東方人心善。但心清淨，即是自性西方。」

【E8】使君又問：「和尚！在家如何修？願為指授。」

【E9】師言：善知識！惠能与道俗作《无相頌》，盡誦取，依此行修，常与惠能一處无別。頌曰：

心平何勞持戒？行直何用修禪？

恩則親養父母，義則上下相憐，讓則尊卑和睦，忍則眾惡無喧。

若能鑽木出火，淤泥定生紅蓮，苦口的是良藥，逆耳必是忠言。

改過必生智慧，護短心內非賢，日用常行饒益，成道非由施錢。

菩提只向心覓，何勞向外求玄？聽說依此修行，天堂只在目前。

【F1】師復曰：善知識！總須依偈修行，見取自性，直成佛道。法不相待，眾人且散，吾歸曹溪。眾若有疑，卻來相問。

【F2】合座官寮、道俗，禮拜和尚，无不嗟嘆：善哉大悟！昔所未聞，嶺南有福，生佛在此，誰能得知！一時盡散。

【定慧一體品】

【G1】善知識！我此法門，以定惠為本。大眾勿迷，言定惠別。定惠躰一不二。定是惠躰，惠是定用。即惠之時，定在惠。即定之時，惠在定。

若識此義，即是定惠等學。學道之人作意，莫言：「先定後惠，先惠後定，定惠各別。」作此見者，法有二相：口說善、心不善，定惠不等。心口俱善，內外一種，定惠即等。自悟修行，不在口諍。若諍先後，即是迷人。不斷勝負，却生法我，不離四相。

【G2】善知識！一行三昧者，於一切處，行、住、坐、臥，常行直心是。《淨名經》云：「直心是道場，直心是淨土。」莫心行諂曲，口但說直、口說一行三昧，不行直心。

但行直心，於一切法，無有執著。

【G3】迷人著法相，執一行三昧，直言：「坐不動，除妄不起心，即是一行三昧。」

若如是，此法同無情，卻是障道因緣。道須通流，何以卻滯？心不住即通流，住即被縛。

若坐不動是，維摩詰不合呵舍利弗宴坐林中。

善知識！又見有人教人坐，看心看淨，不動不起，從此置功，迷人不悟，便執成顛，即有數百般如是相教，故知大錯。

【G4】善知識！定惠猶如何等？如燈、光。有燈即有光，无燈即无光，燈是光之躰，光是燈之用，名即有二，躰無兩般，此定、惠法，亦復如是。

善知識！法无頓漸，人有利鈍。迷即漸契，悟人頓修。識自本心，見自本性，悟即元无差別，不悟即長劫輪迴。

【G5】善知識！我此法門，從上已來，頓漸皆立无念為宗，无相為躰，无住為本。

【G6】無相者，於相而離相。

【G7】無念者，於念而無念。

【G8】無住者，人之本性。

念念不住，前念、今念、後念，念念相續，無有斷絕。若一念斷絕，法身即離色身。念念時中，於一切法上無住。一念若住，念念即住，名為繫縛。

於諸法上，念念不住，即無縛也，此是以無住為本。

【G9】善知識！外離一切相，名為無相。能離於相，即法體清淨，此是以無相為體。

【G10】善知識！於諸境上不染，名為無念。於自念上常離諸境，不於境上生心。莫百物不思，念盡除卻，一念絕即死，別處受生。

學道者用心！莫不識法意，自錯猶可，更勸他人，自迷不見，又謗佛經。所以立無念為宗。

善知識！云何立無念為宗？

只緣口說，不見本性，迷人於境上有念，念上便起邪見，一切塵勞妄想，從此而生。

自性本無一法可得。若有所得，妄說禍福，即是塵勞邪見。

然此教門，立无念為宗。

善知識！無者，無何事？念者，念何物？無者，無二相，無諸塵勞之心。念者，念真如本性。真如即是念之體。念即是真如之用。

真如自性起念，非眼、耳、鼻、舌能。真如有性，所以起念。真如若無，眼、耳、色、聲當時即壞。

善知識！真如自性起念，六根雖有見聞覺知，不染萬境而常自在。外能善分別諸法相，內於第一義而不動。

【G14】善知識！此門坐禪，亦不看心，亦不看淨，亦不言不動。

若言看心，心元是妄，知心如幻，故無所看也。

若言看淨，人性本淨，由妄念故，蓋覆真如，離妄念，本性淨。不見自性本淨，起心看淨，却生淨妄。妄無處所，看者是妄。淨無形相，却立淨相，言是工夫，作此見者，障自本性，卻被淨縛。

善知識！若修不動者，但見一切人時，不見人之是非、善惡、過患，即自性不動。

善知識！迷人身雖不動，開口便說他人是非，與道違背。若看心、看淨者，却障道也。

【教授坐禪品】

【G11】師言：善知識！何名坐禪？

此法門中，無障無礙，外於一切善惡境界，心念不起為坐；內見自性不亂為禪。

【G12】善知識！何名禪定？外離相為禪，內不亂為定。

外若著相，內心即亂。外若離相，心即不亂。本性自淨自定，只為觸境，觸境即亂。

若見諸境心不亂者，是真定也。

外離相即禪，內不亂即定，外禪內定，故名禪定。

【G13】《淨名經》云：即時豁然，還得本心；《菩薩戒經》云：「本源自性清淨。」

【G14'】善知識！於念念中，自見本性清淨，自修自行，自成佛道。

【傳戒歸依品】

【H1】時，師見廣韶洎四方士庶駢集山中聽法，於是升座告眾言：來！善知識！

一會在此，皆共有緣，今各胡跪，傳自性五分法身香：

一調戒香，即自心中，無非、無惡、無嫉妬、無貪瞋、無劫害，名曰戒香。

二定香，即睹諸善惡境相，自心不亂即是也。

三慧香者，自心無癡，常以智慧觀照自性，不造諸惡。雖修眾善，心不執著。畏上愛下，矜孤恤貧，此名慧香。

四解脫香，即自心無所攀緣，不思善，不思惡，自在無礙，名解脫香。

五解脫知見香者，自心既無攀緣善惡，不可沉空守寂，即須廣學多聞，識自本心，達諸佛理，言滿天下無口過，行滿天下無怨惡，和光接物，無我無人，直至菩提，真性不易，名解脫知見香。

善知識！此香各自內薰，莫於外覓。

【H2】今与善知識无相懺悔，滅除三世罪障。善知識！

前念後念及今念，念念不被愚迷染，從前惡行一時除，自性自除真懺悔。

前念後念及今念，念念不被憍誑染，除却從前憍誑心，永斷名為自性懺。

前念後念及今念，念念不被疽妬染，除却從前疽妬心，自性若除即是懺。已上三唱

【H3】善知識！何名懺悔？懺者，終身不作；悔者，知於前非，惡業恒不離心，諸佛前口說无益，我此法門中，永斷不作，名為懺悔。

已上三遍唱。

【I1】師言：今既懺悔已，與善知識發四弘誓願，一時逐惠能道：

眾生无边誓願度，煩惱无边誓願斷，法門无边誓願學，无上佛道誓願成！

已上三唱

【I2】善知識！眾生無邊誓願度，莫道是惠能度。

善知識！心中眾生，所謂邪迷心、誑妄心、不善心、嫉妒心、惡毒心，如是等心，盡是眾生。各須自性自度。

何名自性自度？即自心中，邪見、煩惱、愚癡、迷妄，自有本覺性，將正見度。既有正見，使般若智，除却愚癡、迷妄眾生，各各自度。邪來正度，迷來悟度，愚來智度，惡來善度。如是度者，名為真度。

【I3】煩惱無邊誓願斷，將自性般若智，除卻虛妄。

【I4】法門無邊誓願學，須自見性，學無上正法。

【I5】无上佛道誓願成，常下心行，恭敬一切，遠離迷執，覺智生般若，除却迷妄，即自悟佛道成，行誓願力。

【J1】善知識！今更與善知識授無相三歸依戒：

大師言：善知識！

歸依覺，兩足尊。歸依正，離欲尊。歸依淨，眾中尊。

從今已後，稱佛為師，更不歸依餘邪迷外道。願自三寶慈悲證明！

【J2】惠能勸善知識歸依自性三寶：

佛者，覺也。法者，正也。僧者，淨也。

【J3】自心歸依覺，邪迷不生，少欲知足，離財離色，名兩足尊。

【J4】自心歸依正，念念無邪見。以無邪見故，即無人我、貢高、貪愛、執著，名離欲尊。

【J5】自心歸依淨，一切塵勞、妄念雖在自性，自性不染着，名眾中尊。

【J6】若修此行，是自歸依。凡夫不會，從日至夜，受三歸依戒。若言歸依佛，佛在何處？若不見佛，即无所歸，既无所歸，言却是妄。

善知識！各自觀察，莫錯用心，經文分明，只言自歸依佛，不言歸依他佛。自佛不歸，無所依處。

【K1】師言：善知識！各各至心，一時逐惠能口道，令善知識見自三身佛：

於自色身，歸依清淨法身佛。

於自色身，歸依千百億化身佛。

於自色身，歸依圓滿報身佛。

已上三唱。

【K2】善知識！色身是舍宅，不可言歸，向者三身在自性中，世人盡有，為自心迷，不見內性，外覓三身如來，不見自身中有三世佛。

善知識聽！與善知識說！令善知識於自身中，見自性有三世佛。此三身佛從自性生，不從外得。

【K3】何名清淨法身佛？世人性本自淨，萬法在自性：思量一切惡事，即行於惡行；思量一切善事，便修於善行，如是一切法盡在自性。自性常清淨，日月常明，只為浮雲蓋覆，上明下暗，不能了見日月星辰。忽遇惠風吹散，卷盡雲霧，上下俱明，萬像參羅，一時皆現。世人性淨猶如清天。

惠如日，智如月，智慧常明。於外著境，被妄念浮雲蓋覆，自性不能明朗。若遇善知識聞真正法，吹却迷妄，內外明徹，於自性中萬法皆現。一切法在自性，見性之人，亦復如是。此名為清淨法身。

自歸依者，除却自性中不善心、疽妬心、憍慢心及不善行，是名歸依。

【K4】何名為千百億化身佛？不思量，性即空寂。思量，即是自化：

思量惡法，化為地獄；思量善法，化為天堂；毒害化為畜生，慈悲化為菩薩，智慧化為上界，愚癡化為下方。自性變化甚多，迷人不能省覺，念念起惡，常行惡道。迴一念善，智慧即生，此名自性化身佛。

【K5】何名圓滿報身佛？譬如一燈能除千年闇，一智能滅萬年愚。莫思向前，常思於後，念念圓明，自見本性。善惡雖殊，本性無二。無二之性，名為實性。於實性中，不染善惡，名為圓滿報身佛。

師言：自性起一念惡，報却千年善心。自性起一念善，報却千年惡滅。無常已來，後念善，念念自見，不失本念，名為報身。

【K6】從法身思量即是化身佛；念念善即是報身佛。自悟自修自性功德，即真歸依也。

皮肉是色身，色身是舍宅，不言歸也。

但悟自性三身，即識大意。

【L1】師言：善知識！聽吾說《無相頌》，若能誦取，言下令汝迷者罪滅。頌曰：

迷人修福不修道，只言修福便是道，

佈施供養福無邊，心中三惡元來造。

擬將修福欲滅罪，後世得福罪還在，

但向心中除罪緣，各自性中真懺悔。
若悟大乘真懺悔，除邪行正即無罪，
學道常於自性觀，即與悟人同一例。
吾祖惟傳此頓法，普願見性同一體，
若欲當來覓法身，三毒惡緣心中洗。
努力修道莫悠悠，忽然虛度一世休。
若遇大乘頓教法，虔誠合掌志心求。

【L2】師言：善知識！總須誦取。依此修行，言下見性，雖去吾千里，如常在吾邊。於此言下不悟，即對面千里，何勤遠來？珍重好去！

【L3】一眾聞法，靡不開悟，歡喜奉行。

六祖法寶記卷終